

四庫全書

史部

欽定四庫全書

弇山堂別集卷八

明 王世貞 撰

異典述三

文臣監修國史

國朝修實錄例以內閣大臣總裁而元勛上公一人監修獨高廟實錄初以曹國公李景隆監修戶部尚書夏原吉副之中用太子少師姚廣孝及夏公至嘉靖中修

睿宗實錄復用禮部尚書席公書吏部尚書廖公紀蓋
特典也

文臣知經筵

故事勛臣一人知經筵內閣臣俱同知經筵後至李文
達賢始以內閣首臣與勛臣俱知經筵而劉文穆劉文
靖楊文忠徐文貞張江陵及今申少師俱因之矣夏貴
溪嚴分宜雖極貴寵而上不御經筵遂成闕事

勛臣從祀孔廟

萬厯中詔以新建伯王守仁從祀孔廟時布衣胡居仁亦與焉真非常之遇也

文臣配享

高廟配享不及文臣洪熙中以太子少師贈少師姚恭靖公廣孝配文皇帝嘉靖中以御史中丞贈太師劉文成公基配高皇帝姚至嘉靖中革賜祀於大興隆寺

藉田孤卿五推

天子耕藉田三公五推九卿九推今例以公侯兼三太

者充之張江陵以少師與五推蓋特恩以為加太傅張本也

文職世文蔭

嘉靖元年楊太師廷和蔣少傅冕毛少保紀以辭伯爵費少保宏以辭蔭錦衣指揮使改蔭錦衣指揮千戶等官復固辭以兵部尚書彭澤言蔭楊公四品在京文職蔣毛五品費七品皆世襲固辭復不許然四公迄無拜

侍郎非本曹

嘉靖中董吳興份以工部尚書管吏部左侍郎事正德
中儲文懿瓘以戶部左侍郎起管右侍郎事又嘉靖初
兵部左侍郎陶諧黎奭俱管右侍郎事萬厯中右都御
史吳允張佳胤管兵部左侍郎事又兵部左侍郎王遴
起管右侍郎事則以左侍無見缺故也萬厯中萬宜興
士和以禮部左侍郎管南京禮部右侍郎事翁餘姚大
立以兵部左侍郎管南京刑部右侍郎事尋以原官管
南吏部右侍郎事胡永昌執禮以兵部左侍郎管南京

兵部右侍郎事則以南部無左侍故也按儲文懿瓊後復以戶部左侍郎起南京左嘉靖初胡端敏世寧以兵左侍告南改吏左非謂南必無左有左不設右有右不設左乃故事也吳興一轉尤為異典

巡撫非部院

永樂間大理寺卿胡槩叅政葉春同撫南直隸太常寺少卿周訥撫湖廣大理寺丞郭瑄撫廣東大理寺丞孫時撫山西通政司叅議朱侃撫廣西正統間大理寺卿

蔡錫撫湖廣大理少卿張驥撫浙江大理寺丞孔公恂
撫直隸景泰初大理寺丞王振撫貴州大理寺卿孔文
英鎮紫荆通政司叅議鄒文學鎮保定大理寺丞羅綺
贊理甘肅軍務李奎撫保定成化間大理少卿吳道宏
撫鄖陽又正統巡撫山西河南侍郎于謙降大理寺少
卿嘉靖巡撫順大僉都御史張陞降寺丞俱仍巡撫

大將軍

國朝將軍掛印者事權甚重可以生殺人而大將軍為

尤重洪武元年以徐中山達為征虜大將軍至十七年卒雖以常開平李岐陽之才且貴重然不過副將軍而已其他有征南征北征西征戎之專寄亦不過將軍而已傳潁公之平雲南鎮北邊張英公之三下交趾統衆多者至八十萬少亦三十萬然皆不得掛大將軍印也余所知者十六人

征北大將軍徐達馮勝藍玉

洪武

丘福

永樂

平北大將軍李

景隆

建文伐燕

柳溥

景泰

朱永

成化

朱暉

正德

杭雄

仇鸞

嘉靖

禦虜

俱

鎮朔大將軍薛祿譚廣

宣德

楊洪石亨

景泰俱
征邊

按譚杭以都督得之尤為異典余嘗見仇鸞銜位云平
北大將軍總督京營戎政統領各路人馬太傅太子太
師咸寧侯可為寒心然未幾死事敗倖及妻子正德中
有稱威武大將軍朱壽者上也而許泰則為副將軍迨
南狩上自稱總督軍務而太監張永與彬曰提督贊畫
機密軍務張忠及泰曰提督軍務一時各邊稱總督者
俱改總制及提督

世廟幸承天以太師翊國公郭勛為都護大將軍太子太傅成國公朱希忠為副將軍

掛兩將軍印

永樂中征南將軍沐晟征蠻將軍韓觀先後掛征夷副將軍印嘉靖中征蠻將軍柳珣亦掛征夷副將軍印俱有安南之師故也

副副將軍

洪武四年徐魏公達北討李曹公文忠馮宋公勝為左

右副將軍鄧衛公愈湯中山和為左右副副將軍按唐諸鎮征黃巢四面行營各設都統而王晉公鐸以上相臨之為都都統事相反而相類

外任下遷翰林

外任左遷而得翰林者洪武中時有之若永樂庚寅許州知州潘文奎以事當降為有文學改左春坊司直郎乙未湖廣按察僉事言蘄州同知桂宗儒柔懦當黜以任淺送都察院問刑三載改翰林院修撰宣德丙午吏

部言四川按察使陳璉不諳憲法改通政使掌國子監祭酒因謫而遷清近誠為異事壬子大學士楊士奇等言交趾南靈州草任知州黎恬有文學改右春坊右諭德又山東左叅政俞士吉考滿升詹事府詹事亦可謂非望之典最後如雲南布政使陳文之入為詹事浙江布政使李默之入為太常寺卿掌南京國子監祭酒事皆視若登仙矣

翰林兼諫官

洪武中夏公原吉范公顯祖以太子賓客兼治書侍御史永樂丁未李公準以太子賓客兼吏科都給事中嘉靖庚戌趙公貞吉以左春坊左諭德兼河南道御史宣諭行營己丑夏公言以翰林院侍講學士兼吏科都給事中李以三品兼七品尤異國初治書侍御史階正四品盖今僉都御史官也

翰林改給事中

正統中大學士金幼孜子翰林檢討達改給事中成化

中翰林檢討李昊改南京禮科給事中昊忻王教授王
薨故也

翰林改御史

洪武中翰林院編修馬亮任敬王璉王輝陳敏張惟洪
熙元年翰林院侍講李時勉羅汝敬俱改監察御史仍
限李羅一日言一事凡三日而下獄正統己巳徐公瑾
以翰林院侍讀改浙江道御史募兵彰德楊公鼎以右
春坊右中允改河南道御史募兵兗州檢討王玉改江

西道御史募兵濟南俱事完復故官

翰林改教授

永樂乙未進士第二人李貞第三人陳景著俱以翰林院編修九年滿當遷改鄉官便養貞得高州府景著得福州府俱教授遂以此官終其身景著及第時僅十八尤可惜也又有錢唐王羽者由太常少卿請便養亦得杭州教授正德中援此例以授興化養親御史陳茂烈

固辭

狀元謫任

狀元授官以後謫為他官者羅倫舒芬俱自修撰謫市舶司副提舉呂柟自修撰謫解州判官張昇自左庶子謫工部員外郎俱以言事陳謹自修撰謫廣州府推官以公誤范應期以修撰謫南京大理寺評事以被論

進士徑授編檢

洪武十八年乙丑授進士馬京等為編修吳文為檢討建文庚辰進士吳溥楊榮楊溥俱為編修蓋官制未定

也若正統己未進士錢溥教內使徑授檢討正德三年
徑授二甲第一人焦黃中三甲第一人胡纘宗為檢討
蓋中人瑾變亂成法且欲私其門客及鄉人故也

首甲不授翰林

洪武四年初開科狀元吳伯宗授禮部員外郎

時正六品

第三

二第三人郭朏吳公達俱吏部主事

從六品

而會元俞友

仁中三甲為縣丞蓋官制未定也丁丑狀元陳郊第三
人劉鐸成謫補鴻臚寺司賓署丞尹昌隆授禮部主事

以人言考官私南人故也嘉靖壬辰第二人孔天胤授陝西按察僉事以王親故也

給事御史互改

洪武中給事中宋善萬徵彭通王惟言王暉改監察御史李燦以御史改工科給事中兼齊王府錄事若永樂江西道御史汪俊民改刑科給事中山東道御史文郁改工科給事中吏科右給事中羅亨信工科給事中周岐正統給事中朱良暹李運俱改監察御史又給事中

金達王庾暫改御史募兵正德兵科都給事中王翊刑
科給事中張禴工科都給事中段豸俱改御史查盤凡
五六見若王肅敏廷相以庶吉士授兵科給事中降毫
州判官陞高淳知縣入為監察御史邇來徐貞明以給
事中謫按察照磨陞推官兵部主事尚寶司丞再以尚
寶卿兼御史治水利尤異

布衣總裁國史

永樂詔重修高廟實錄布衣陳濟與學士解縉等為總

裁而禮部尚書李至剛及講讀以下僅為纂修官

布衣考試

洪武四年京畿試前元貢士鮑恂與學士宋濂等同為
考試官

三布衣優禮

國朝優禮處士與處士所以自處者毋過於陳靜誠遇
吳康齋與弼武學士周文而已陳在高帝初應聘與叅
帷幄大計再授翰林院學士辭授禮部侍郎尚書以至

尚書左丞又辭竟以處士卒遣中官諭祭官為賻葬有
子枋以遇故特擢累官至尚書武在文廟初以藩邸講
讀之舊驛召至京賜襲衣銀帶鞍馬以為翰林院侍講
學士固辭聽以學士致仕賜勅及白金文幣酒餼馳驛
歸吳在英廟時遣行人齎勅及金幣驛召引見授左春
坊左諭德賜宴文華殿內閣學士李賢待再賜金幣羊
酒三辭俱溫音慰畱最後賜勅及銀幣給月米遣行人
護歸其初聘勅曰朕承祖宗求賢圖治亦有年矣永惟

勞於求賢然後成無為之治樂於忘勢乃能致難進之
賢聞爾與弼潛心經史博洽古今蘊經國之遠猷抱致
君之宏畧爾乃嘉遜丘園不求聞達朕眷懷高誼思訪
高賢渴望來儀以資啟沃今特遣行人曹隆往詣所居
徵爾赴闕仍賜禮幣以表至懷爾其惠然就道以副朕
翹待之意賜歸勅曰朕惟自古英君誼辟莫不好求賢
士以臻治理故服位以來深思先務莫急於此聞爾與
弼懷材抱道嘉遜林泉特遣行人齎捧書幣造廬徵聘

爾乃惠然肯來深慰朕懷欲煩輔導東宮特授春坊諭
德爾以衰老固辭朕堅意不允畱之數月病勢不已乃
知本心非不欲仕第以不能供職故耳於是特允所辭
且以嘉猷勗朕足見忠愛之誠仍遣行人送還故里賜
以銀幣用表至懷復命有司月給米二石以資供膳爾
其優游桑梓安身樂道以度遐齡倘精力未衰尚其無
忘纂述以繼前賢輔教垂世之意其初授官賜銀幣辭
疏旨曰朝廷久聞高義特用徵聘今惠然遠來朕深嘉

悅然幣以將誠官以命德禮非過也不允所辭面見諭
曰重卿學行特授宮僚煩輔太子再辭疏旨曰朕知乃
心不干仕進故不煩以冗務特處以宮僚之職不必再
辭三疏辭旨曰固辭雖得難進之義揆之中道無乃過
乎欲觀秘書可勉就職觀此二勅三旨一諭雖內閣輔
臣其優禮遠不能過也

編修主會試

洪武戊辰國史編修蘓伯衡李叔荆主會試

編修主鄉試

永樂癸未編修王達戊子檢討王洪甲午編修周述正
統丁卯檢討錢溥成化乙酉編修彭華俱主應天試

司直修撰主會試

永樂己丑左司直郎徐善述乙未翰林院修撰梁潛王
洪景泰辛未修撰林文主會試

待詔典籍紀善主會試

洪武乙丑翰林院待詔朱善前翰林院典籍聶鉉丁丑

吉府紀善白信蹈主會試

致仕官主試

洪武乙丑命前翰林院典籍聶鉉主考會試宣德癸丑
前少保戶部尚書武英殿大學士黃淮主考會試聶待
選吏部黃以謝恩適至京故也然聶以卑官得之其同
試乃有講讀以上者尤為奇矣

非翰林官主試

洪武三年主鄉試者御史中丞劉基治書侍御史秦裕

伯丁丑主會試者吉府紀善白信蹈革除中太常寺少
卿高巽志主己卯庚辰鄉會試

同考官尊於主考

洪武丁丑紀善白信蹈主會試而同考則侍讀張信侍
講戴彝正德丙辰侍講學士陳循主會試而同考則太
常少卿魏驥景泰辛未修撰林文主會試而同考則侍
講劉儼廣東叅政羅宗本

三伯讀卷

廷試讀卷官當以內閣及九卿詹事翰林學士為之惟
天順丁丑徐有貞以武功伯掌內閣王驥以靖遠伯掌
兵部楊善以興濟伯掌鴻臚寺讀卷居諸公首亦時制
之變也成化中王越以威寧伯兼宮保掌都察院亦預
讀

異途官讀卷

又正統中左都御史楊善以守城生員戶部左侍郎掌光
祿寺事柰亨以吏員太常少卿程南雲以習字生讀卷

尤為奇事亨序列內閣戶部右侍郎兼學士陳循上

特賜出身

宋制大臣或有不由科第者特賜於某人榜出身或用
累舉恩賜第國朝無之唯永樂間曲阜孔諤以舉人至
京中副榜第一人諤宣聖後皇太子召見特賜進士出
身授左春坊左中允侍講讀

鄉試不第而特許會試者景泰中陳瑛王倫也

大學士
循文子

有疏會試不第而特賜廷試者洪武中韓克忠等一榜進

士也會試不第免廷試特賜進士出身者孔諤也

一云諤超

授中允未賜進士出身

後文皇帝改監察御史

贈進士

天順七年貢院災會試舉人死於火者九十人事聞俱贈進士出身

一歲兩狀元

洪武丁丑廷試賜陳郊劉鍔尹昌隆及第後以舉人訴覆試復取韓克忠王恕焦勝及第凡二榜兩狀元而二

公官俱不顯

連歲狀元

永樂辛卯始廷試寄監中式舉人陳璠等賜蕭時中苗衷
黃暘及第明年復廷試中式舉人林誌等賜馮鐸林誌
王鈺及第連歲二狀元而皆不顯

會試四主考

天順癸未禮部左侍郎學士陳文尚寶少卿兼修撰柯
潛為考試官貢院災以次年改太常少卿學士彭時侍

讀學士錢溥

丞相知貢舉

洪武三年應天鄉試特進右丞相汪廣洋左丞相胡惟庸知貢舉御史中丞劉基治書侍御史秦裕伯主試同考則侍讀學士詹同弘文館學士睢稼起居注樂韶鳳尚寶丞吳潛國史編修宋濂四年仍鄉試主試兵部尚書吳琳國子監司業宋濂尋會試知貢舉仍廣洋惟庸又設主文官為禮部尚書陶凱前翰林侍講學士潘廷

堅考試翰林侍讀學士詹同國子監司業宋濂等

知貢舉官讀卷

禮部尚書知貢舉不得為讀卷官唯永樂中特詔尚書
呂震嘉靖中特詔尚書嚴嵩讀卷皆異數也

典史中會試

曹文襄萬以太和典史運糧至京乞會試得第二人廷
試復為第一人十年遂登相位後有刑部吏南昱松
陵驛丞鄭溫然位不甚顯考蘓州志常熟黃鉞叔楊亦

以典史中會試

朱書黃榜

永樂甲辰上臨軒策士初以孫曰恭為第一邢寬為第二既而曰孫暴不如邢寬遂擢寬第一曰恭第三仍朱書黃榜一時以為盛事

同考試官作試錄序

洪武二年京畿鄉試錄序出於國史院編修宋濂四年京畿鄉試錄序復出於濂俱國子司業是秋會試錄序

復出於濂俱同考試官最後者蓋濂以文學見重故耳
嘉靖甲辰主考禮部尚書學士張潮卒於試院同考翰林修撰茅瓚為後序甲子應天主考中允孫世芳卒於試院同考吏部蔡國珍為後序

一歲兩考庶吉士

永樂甲申擇二甲文學優長者楊相等五十一名及善書湯流等十人俱為翰林庶吉士進學五月擢庶吉士杜欽王惟正節慶為戶科給事中周玉羅亨信張侗為

工科給事中明年正月始復選楊相劉子欽彭汝器王英王直余鼎章敬王訓柴廣敬王道熊直陳敬宗沈升洪順章朴俞學夔羅汝敬盧翰湯流李時勉段民悅吳紳楊勉及首甲修撰魯滌編修周述周孟簡二十六人於文淵閣肄業所謂二十八宿者而周忱陳請與焉司禮監月給筆墨紙光祿寺日給酒饌禮部月給膏燭工部人給第舍按今人但知二十八人不知其先取六十一人也宣德癸丑選年少質美者尹昌黃瓚趙智陳雲

傳綱黃回六人為庶吉士令王直教習十一月復選徐
珵賴世隆吳節李紹姜洪虞瑛潘洪王玉陳金劉實鄭
建方熙何瑄為庶吉士并令王直教習今人但知徐珵
即有貞為首不知其有尹昌等六人也蓋一榜有前後
兩庶吉士矣若嘉靖壬辰初取錢亮許樾閔如霖衛元
確段承恩韓昂扈永通呂光洵謝九儀劉光文黃獻可
劉士達劉思唐閻樸胡守中錢籍王梅雷禮邊泮李大
魁郭希顏進呈矣上閱卷見彌封有不固者寢之尋詔

復選得呂懷范瑟錢亮黃應中秦鳴夏邊沆閔如霖王
珩衛元確浦應麒游居敬趙汝濂劉思唐閻樸胡守中
李本趙維垣何城王梅李大魁郭希顏蓋以後選為重
也

冠帶舉人

永樂甲申翰林院試下第舉人張鉉等六十一人俱賜
冠帶於國子監進學以俟後科丙戌廷試乙榜舉人周
翰等二人俱賜冠帶於國子監進學餘除教官己丑國子

監試下第舉人熊槩金庠等十餘人并會試中式舉人陳璣等俱寄國子監不給冠帶宣德癸丑試乙榜龍文通章瑾等二十四人如張鉉例給訓導俸致諸冠帶舉人登第者十不下六七而名世之臣不與焉

史官教庶吉士

教習庶吉士多用學士以上官亦間有及講讀者惟正統乙丑初用編修趙恢後用修撰王振

藩臬兼任

成化中湖廣右布政使陶魯兼廣東按察副使正德中
江西右布政使吳廷舉兼本省按察副使嘉靖中山西
右叅政王輪兼按察僉事山西右叅政李恭江西右叅
政張景賢浙江右叅政劉濤俱兼按察副使蓋皆為兵備
地方有年勞或功賞故也以吾吳兵備言之山東右叅
政任環湖廣右叅政王叔杲俱兼按察僉事湖廣右叅
政湯賓兼按察副使凡三人近年以來不可勝紀襄陽
兵備楊一魁則陞右叅政無兼秩吾蘓松兵備馮叔吉

徐節蹇達則直為湖廣按察使萬厯十五年有致縉紳
錄至者閱之為駭然因記於此亦時制一大變也

以按察使飭兵者湖廣蘄州李琦河南汝南胡緒山西
冀北王緘陝西寧夏戴光啟固原李廷儀甘州邢玠山
東齊山曹子朝四川下川南蔡國珍廣東海南陳瑛雲
南騰衝姜忻清軍邊維垣廣西賓州陳洙

以右叅政飭兵備者北直隸永平葉夢熊密雲郭四維
紫荊張修吉宣府王學書遼東海蓋郝杰山西冀寧許

雲濤陝西莊浪茹宗舜靖邊李春光岷州郭汝河州張
思忠臨鞏石櫃隴右趙煥

以右布政使掌按察司者河南王體復

特涖鄉土

永樂中西安人楊恭自刑科給事中擢陝西右布政使
開封人許廓以工部左侍郎彰德人王彰以右都御史
俱巡撫河南兗州人樊敬以右通政兼行軍司馬鎮濟
寧

吳人陸公完以逐流賊至吳提督軍務撫臣俱聽節制
秦人彭公澤以平蜀寇由關中進兵後處置哈密事復
總甘肅諸鎮軍務楚人陳公金以討姚源賊兼總七鎮浙
人趙文華以征倭提督閩人張經徽人胡宗憲俱以備
倭總督山西人則少師太宰楊公博少保大司馬王公
崇古天津人右都御史劉公濤真定人大司馬梁公夢
龍俱以總督禦敵吾吳少司馬劉公畿亦以總督討徽
寇俱涖本土

節制各省

弘治以前雖有大征而文臣多係參贊即有重寄多是
本省節制及隨行官軍而已正德中陸司馬完彭中丞
澤破山東河南大盜兼督二省南北直隸湖廣陳尚書
金破東鄉姚源盜總制江西浙江福建湖廣南直隸等
處洪尚書鍾破籃鄢盜總制湖廣鄖陽陝西河南四川
等處嘉靖中平田州亂王新建伯守仁總督廣東廣西
江西湖廣諸處拒北邊翟尚書鵬總督宣大遼薊北直

隸山西河南等處平江西寇胡尚書宗憲總督兩浙南
直隸江西福建諸處俱聽便宜行事鎮巡等官俱聽節
制

兩京文臣總督

京營兵馬例以公侯伯總督而文臣或提督或協理南
京守備例亦用公侯伯而文臣稱叅贊其奏疏行移坐
次皆出其下惟景泰初于肅愍謙以少保大司馬稱總
督軍務列武靖侯石亨上王忠毅以靖遠伯大司馬稱

總督機務坐守備寧遠伯任禮左蓋以二公望重故優寄之後不爾也

勛臣巡撫

文臣稱巡撫而武臣內臣稱鎮守例也獨宣德中少師隆平侯張信巡撫陝西而嗣後都御史陳鑑王文侍郎耿九疇却稱鎮守

給事中巡撫

永樂十九年遣給事中馬俊等同尚書蹇義金純等巡

行天下撫安軍民俊往南直隸葛紹祖往四川王勵往
河南李瑒往陝西許能往浙江章雲往江西徐初往福
建陶衍往北直隸劉渙往山東劉蓋往湖廣艾廣往廣
東蕭奇往山西楊春往廣西正統十四年命吏科都給
事中張固往河南裕州兵科都給事葉盛往陳州等處
勅其招撫流移耕種生理仍提督各衛所操練軍馬固
守城池如有賊寇生發相機勦捕毋致滋蔓

錦衣一品

錦衣典親軍其後寄以詞察之柄體勢日重然本非尊官也故雖紀綱門達逮杲之寵寄橫肆然綱達不過都指揮僉事杲僅指揮同知而已袁彬自都指揮出僉都府方晉橫王正德初指揮高得材緣從父鳳柄司禮轉陞右都督終以非例於五府帶俸錢寧繼踵此官雖貴盛之極而意猶歉之請以都指揮理事下兵部議曲為諛解遂成不疑沿流至於陸朱極矣今攷太保兼少傅者一人陸炳太保兼太子太傅一人朱希孝太子太傅

一人劉守有左都督一人錢寧右都督一人陳寅都督
同知一人余蔭已上皆掌衛督行事官校者也右都督
一人錢安都督同知三人袁天章孫鈺楊俊士已上同
掌衛督捕者也其它恩蔭管事左右都督如麥祥高恕
黃浦之類不可勝紀矣

弇山堂別集卷八

欽定四庫全書

弇山堂別集卷九

明 王世貞 撰

異典述四

勲臣總省府臺

洪武中詔太師韓國公李善長曹國公李文忠總理中書省大都督府御史臺事後命韓公專理臺事曹公亦出鎮

勲戚理文職

永樂初以北京行部尚書缺請特詔駙馬都尉李讓兼
領再命讓領北平布政司事又洪武中命汝南侯梅思
祖掌雲南布政司事駙馬都尉王恭兼福建行省叅政
勲戚理太學

洪武中上以公侯子弟在太學者多驕慢不習訓詔曹
國公李文忠提督國子監又二十九年署國子監學正
吳啟言國子師生例以太學優劣分隸六堂邇來皆無

甄別高下不分無以激勸宜考第如例上命魏國公徐
輝祖率禮部翰林院官詣監考試諸生等第吏部以次
錄用

文臣掛將軍印

正統中王靖遠驥以兵部尚書征湖貴苗充征蠻將軍
成化中王威寧越以左都御史出征充平胡將軍守大
同充征西前將軍改鎮延綏充靖虜副將軍俱掛印

文武二銜

洪武初張彪以統兵元帥兼知全州王王以副元帥兼州同知呂兼明以義兵元帥兼知永康縣陳從貴以帳前總管兼知東陽縣王道同兼知永康縣胡深以右司郎中兼吳王府叅軍總處州兵汪廣洋以左司郎中兼驍騎衛指揮馮勝以右都督兼詹事府詹事中書省叅政鄧愈兼僉行樞密院又以征戍將軍兼左諭德征西將軍湯和兼左諭德華雲龍以都督同知兼北平行省叅政丁玉以廣西行省叅政兼本衛指揮使耿炳文以

陝西行省叅政兼秦王府武傳曹興才以山西行省叅政兼領太原衛指揮事郭雲以南陽衛指揮使兼知南陽府呂文燧以永康翼左副元帥兼知縣

勛戚公侯以下帶師傅不可言文武二銜也若都督雖帶銜亦宜附紀景泰中太子太保都督僉事張輓成化中太子太保左都督趙勝嘉靖中太保太子太傅征西將軍大同總兵官周尚文太子太保征西將軍左都督大同總兵官梁震太保兼少傅左都督掌錦衣衛陸炳

太保兼太子太傅左都督掌錦衣衛朱希孝蓋祖宗朝都督有勞寧封流伯而不加保傳典制一變也後累加遼東總兵官左都督李成梁太保兼太子太保薊鎮總兵官左都督戚繼光少保兼太子太保錦衣衛掌衛事左都督劉守有加太子太保太子太傅

武臣贈官得師傳者尤少嘉靖中梁震贈太保岳懋贈少師李涑殷尚質楊照王治道贈少保隆慶初周尚文贈太傅皆總兵也萬厯初朱希孝贈太傅則錦衣也

文臣理武職

天順中楊善以禮部尚書改掌左軍都督府成化中王
威寧越以左都御史改掌前軍都督府仍總五軍營兵
提督團營操練俱帶伯爵

武臣理文職

洪武中大將軍徐達以衛鎮撫吳勉權大都路知府又
起用致仕百戶楊山署掌芒部軍民府

武臣改文

洪武帳前總管王道同為義烏知縣荊州衛指揮使蔡
僊為廣西行省叅政元帥單安仁為按察副使再以瑞
州守禦千戶為將作卿管軍鎮撫薛祥進都漕運使十
四年起致仕鎮撫張真拜兩淮都轉運鹽使司運使按
張真者錦衣衛鎮撫後調太倉余於其家得御寶勘合
驗之則山東布政使司左布政也其制亦與今憑文不
同十五年起致仕南陽右衛百戶吳權為福建布政使
司右布政使濟寧左衛鎮撫胡溥為山東布政使司右

布政使濟川衛百戶周景為左叅議永平衛百戶范誠
為右叅議宣武衛百戶張端為山西布政使司左叅政
永清右衛千戶王福為叅議永平衛百戶劉清為右叅
議龍驤衛百戶張林為廣東布政使司左叅政南昌衛
所鎮撫江崇為右叅議羽林左衛百戶龍德為浙江布
政使司右布政使周先為四川布政使司左布政使徽
州守禦所百戶周良為陝西布政使司右布政使又以
散騎舍人耿瑄為尚寶司卿十八年改陝西都指揮楊

貴為河南左布政使天策衛所鎮撫歐陽相佐為四川
布政使司左布政使水軍衛所鎮撫馮翼為右布政使
致仕水軍左衛鎮撫張貞為湖廣布政使司左布政使
此張貞非前張真也處州衛所鎮撫陳蠡為右布政使廣武衛所

鎮撫左傑為江西布政使司右布政使府軍前衛百戶
周良為山東布政使司左布政使武德衛鎮撫馬淵為
福建布政使司右布政使羽林右衛鎮撫蔣彝為廣西
布政使司左布政使又宣武衛鎮撫徐麟為河南府同

知以戰功進知府又以韃靼指揮使安圖為刑部尚書
元降將索諾木結為治書侍御史約爾珠為左副都御史
和克齊為工部右侍郎

永樂百戶劉泰改建寧府通判至禮部員外郎

成化中錦衣衛百戶何瑾為尚寶司丞府軍前衛副千
戶于冕改兵部員外郎

文臣改武

洪武中中書左丞吳宏左遷親軍指揮使中書右丞兼

右詹事趙庸江淮叅政傅友德俱陞同知大都督府行
省平章李文忠改左都督江西行省叅政汪興祖陞都
督僉事左司郎中單安仁改守禦千戶大都督府斷事
脫列伯陞驍騎右衛指揮僉事太僕寺卿商暉為中府
都督僉事子敬復以太僕卿為大同衛指揮僉事九江
知府丁玉陞都衛都指揮溧水知縣郭雲陞南陽衛指
揮僉事燕府左相費愚為中護衛指揮使尚寶司丞楊
能陞都指揮使尚寶卿耿瑄仍陞前軍都督僉事尚寶

卿徐膺緒陞大同衛指揮僉事雲南鶴慶府知府董賜
為雲南前衛指揮僉事

永樂初燕府紀善李賢陞都指揮僉事保定府同知朱
真陞中衛指揮同知雜造局大使宋得陞羽林前衛指
揮僉事陵川訓導劉泰陞百戶

洪熙中鴻臚少卿喀達克陞錦衣衛光祿寺署丞馬成陞
金吾右衛俱指揮僉事尚寶卿朱琇陞金吾左衛指揮
使

宣德初光祿寺卿胡榮鴻臚序班孫愚陞都督僉事

后及

貴妃父愚
尋改名忠

兵部左侍郎張信改錦衣衛世襲指揮同知後至四川

都司都指揮使鴻臚寺丞何敏陞錦衣衛指揮僉事正

統工部主事吳賢

即尚書吳中子

改錦衣衛世襲百戶後陞千

戶

天順中太常寺奉祀劉謙陞錦衣衛正千戶翰林院典

籍馮瑄陞錦衣衛副千戶廣西右叅政岑瑛陞本省都

司都指揮使

璚土官也

成化十一年陞文思院副使王綱高明錦衣衛所鎮撫
十六年陞鴻臚寺序班許暘通政司經歷何璋俱所鎮
撫又文思院大使毛祥營繕所副沈智姚興俱錦衣衛
所副千戶所副盛能所丞陳全文思院副使周貴周六
一劉榮馮宇俱錦衣衛所百戶十八年陞文思院副使
顧羊保孟林俱錦衣衛所百戶十九年陞文思院副使
李聰等五人俱錦衣衛所鎮撫又陞通政司知事張禮

錦衣衛世襲副千戶文思院副使張旺段撫理錦衣衛
所百戶二十年陞文思院副使葛信王貴顧珙錦衣衛
所鎮撫二十一年陞禮部司務李宗義文思院副使高
清俱錦衣衛所百戶鴻臚寺序班姚通錦衣衛所鎮撫
又陞文思院大使郭成姚安等錦衣衛所百戶徐綱陳
謙所鎮撫又改上林苑錄事汪憲錦衣衛試百戶按憲
實改衙門餘俱帶銜於文華武英仁智三殿及御用監
供事者也

弘治中鴻臚寺卿張巒為中軍都督府都督同知

后父也

中書舍人袁熹襲錦衣衛都指揮僉事進士梅純襲孝陵衛指揮使陞中都副留守又田州府知府岑猛降福

建平海守禦所百戶

猛土官也

正德中兩浙鹽運司同知劉瑄陞錦衣衛指揮僉事平

谷縣知縣楊某陞錦衣衛所百戶文思院副使方景陞

錦衣衛所百戶

嘉靖初鴻臚寺卿陳萬言陞中軍都督府都督同知

后皇

父也湖廣右布政使掌永順宣慰彭世麒陞都指揮使崇

明知縣吳大本仍襲原衛指揮使

隆慶中兩淮鹽運司判官鄭崇孝仍襲錦衣衛左所正

千戶

萬曆中文思院副使王偉陞錦衣衛指揮使

皇后父也

又州

判官金丹陞所鎮撫仕至都指揮僉事世襲指揮同知

文臣國戚

高帝時太常寺卿前吏部尚書呂本女為懿文皇太子

繼妃英宗女重慶公主下嫁鴻臚寺卿周顥子璟憲宗女仁和公主下嫁尚寶卿齊佑子世英顥佑遷一官帶俸不任事

文武臣掌中外兵

國朝之制總禁兵者不得預外兵惟嘉靖中有邊寇都御史楊恪愍公守謙自保定咸寧侯仇鸞自大同各入援詔守謙提督中外諸軍已鸞至拜總督亦如之又命文職三品武職都督已下悉聽軍法從事楊僅數日遇

禍仇聲勢殊烜灼而禍尤慘

又

倭事起南京兵部尚書張公經不置叅贊機務兼總督南直隸浙江等處軍務事權亦類之尋以明年下獄

勛戚大臣為指揮使

洪武中駙馬都尉王克恭領福州衛指揮使黃琛領淮安衛指揮使靖海侯吳禎出領定遼衛指揮使建文初起在間越雋侯俞通淵領豹韜衛指揮使

駙馬伯二品

國初駙馬都尉黃琛王克恭誥稱鎮國上將軍忠勤伯
汪廣洋誠意伯劉基誥稱資善大夫護軍以階勲攷之
蓋正二品也琛克恭所尚主於上從姊例當裁為儀賓
上不忍故仍其號而下其階誠意歲祿二百四十石僅
視四品所不可曉

指揮掛將軍印

洪武二十八年命蘄州衛指揮僉事胡冕為征蠻前將

軍六安衛指揮同知宋晟武昌荊州二衛指揮僉事徐
越榮鑄副之討郴桂山賊又於二年命潭州衛指揮同
知丘廣為總兵官寶慶衛指揮僉事胡海廣西衛指揮
僉事左君弼為左右副總兵討左江上思州蠻三十年
命湖廣都指揮使齊讓為平羌將軍蘄州衛指揮僉事
胡冕六安衛指揮僉事宋晨為左右副總兵討古州蠻
按齊讓係都指揮而丘廣不掛印差少異耳然司衛官
任大將亦後代所無之典

駙馬封侯

洪武中李貞封恩親侯以恩澤建文中駙馬都尉李堅
封灤城侯以破燕功永樂初王寧封永春侯以納款功
索容封廣平侯李讓封富陽侯以靖難功嘉靖初崔元
封京山侯以迎駕功贈侯者景泰初井源以土木死事
贈鉅鹿侯

駙馬加公孤

嘉靖中崔元加太子太傅再加少師太保太傅蔡震謝

詔俱加太子太保

駙馬坐府典兵

永樂間駙馬李讓素容俱鎮守北京仍理行府都督事
王宣鎮雲南沐昕初同襄城伯李隆守備南京至正統
間革猶與趙輝俱掌南京都督府自後所掌惟宗人府
及領侍衛將軍力士而已又宋琥宋瑛相次掛平羌將
軍印鎮甘肅

駙馬提學

洪武十九年勅駙馬都尉梅殷提督山東學校兼理
地方事務朕觀古之帝王必賴賢才輔佐以成治功賢
才之在天下必待明師教育以成器用爾駙馬都尉梅
殷幼承家教長能篤學精通經史頗有才華雖乃武臣
之裔堪為文儒之宗今特命汝提督山東學校作養人
才兼理地方等處事務汝惟欽承朕命勿負所托

外戚握兵政

國朝自成祖而後后妃不選公侯家正統初太皇太后

下詔裁彭城伯張景左都督張昇不得與議朝政自後
雖爵至公侯位為師傅亦優游食祿奉朝請而已惟會
昌侯孫繼宗以元舅總團營兵馬監修國史知經筵迨
八十告老猶掌後軍都督府事此亦政體一大變也夫
以張壽寧兄弟之寵方安平后父之重李武清外祖之
尊而皆不得預此千古所當法也

勛戚武臣直廬應制

國家應制對揚之作惟屬之詞林近臣雖九列不與而

嘉靖中顧獨賜直廬以居諸貴往往勛戚武弁亦得參之如醮詞門聯以至表啟歌頌之類手無停筆掌無虛日今可紀者勲臣太師太子太師翊國公郭勛太師兼太子太師成國公朱希忠太傅太子太師咸寧侯仇鸞親臣太傅兼太子太傅駙馬都尉京山侯崔元駙馬都尉鄔景和少保太子太保安平伯方承裕武臣太保兼少傅左都督掌錦衣衛陸炳太保兼太子太傅左都督掌錦衣衛朱希孝後勛鸞以它事敗景和不能其事罷

直

錦衣指揮侍經筵

故事以勛臣極尊一人知經筵以次尊一人侍經筵正統末特詔錦衣指揮同知王山侍經筵以太監振第故也

武臣兼總團營廠衛

正德十四年左都督平虜伯朱彬以提督團營總兵官兼督東廠及錦衣衛官校辦事團營太監張永谷大用

主之東廠張銳主之錦衣朱寧主之彬兼綰三務中外
大柄悉歸之矣彬扈行稱提督贊畫機密軍務總兵官
仍督辦事官校不久亦敗

朱彬即
江彬也

內臣任文銜

洪武置定遠牧監屬太僕以中官李善為監副胡清董
良為御史又光祿寺卿而下用士人內官庖役相兼散
官照本行給授永樂命上林苑監署正至丞簿悉內官
文臣兼任若外臣任內職則前江彬督東廠也

外臣任內政官

洪武初杜安道以帶刀宿衛授尚冠郎遷御用監令供奉司今皆內臣職也最後遷光祿寺卿

番將握兵

祖宗時番將有功雖累封至侯伯不得掌五府都司衛所印及總兵鎮守或入奉朝請或於各鎮住牧惟有征行則遴所部精騎以從或別將則副大帥耳天順初以恭順侯吳瑾掌右軍都督府瑾故恭順伯允誠即巴圖

特穆爾孫也廣義伯吳琮鎮寧夏琮亦巴圖特穆爾孫也東寧伯焦壽鎮薊州及甘肅故指揮巴爾斯台孫也右都督芮成鎮四川指揮博囉子也史以為番將握兵之始自是而後不可勝紀

土官陞府部大臣

洪武土官宣慰使鄭彥文陞工部左侍郎永樂交州府知府阮均為刑部左侍郎建昌府知府同彥翊演州府同知黎思凱為刑部右侍郎景泰守禦潯陽都指揮同

知黃琬為左軍都督府同知管府事

內閣制勅兩房極品

制勅二房官其職雖司典籍具內外制草及謄寫然不過為大學士供筆硯役人而已間取科甲一二充之然外制之重者別舉翰林講讀以下司其事固不得與也故兼官至九列其在科目者則出而為鄉佐以藝選者不過加服俸而已惟武世二廟稍有躡等至穆廟而始復為限量其至尚書者三人禮部張駿工部周惠疇張

文憲至左侍郎者一人禮部張電右侍郎者二人工部
談相王槐文憲官侍郎時大學士李公本為少詹事官
尚書時李公為侍郎然供事如初

五孝子舉

洪武中布衣李德成以孝子舉為光祿寺署丞遷陝西
右叅政至右布政使永樂中權謹舉官亦如之遷文華
殿大學士通政司右叅議洪武末張信舉為尚寶司丞
遷少卿至卿以終永樂八年總旗張法保剗肝療祖母

旌擢如信武寧人張仲賢剏肝療祖母旌如法保擢鴻臚寺司儀署丞

尚書待詔

嘉靖中盛端明以太子少保顧可學以太子太保俱歷禮工二部尚書食祿優饒錫賚蕃庶顧上疏乞奉朝請陪祭遂獲遣拜內殿三皇五帝先師孔子復獲譔題名記

題名記非翰林臣撰

進士題名記例以內閣大臣歷年請撰其非翰林而撰者惟嘉靖末六記俱撰自內閣嚴公李公禮部徐公詹府孫公外上以命吏部左侍郎李公默李非翰林臣上意盖有深屬也而帶俸尚書顧可學遂為丁未題名記尤可駭

非二品銀印

武職都督府都指揮使司文職六部都察院凡二品以上用三疊篆掛印將軍柳葉篆皆銀印獨漕運總兵印

同將軍順應天二府尹三品得用銀印文淵閣五品用銀印而差小玉筋篆

二品麟玉

衍聖公正二品誥命例用犀軸常服鶴袍犀帶宣德請給玉軸誥命景泰賜麟袍玉帶自是以為常其大朝會宴享在左班一品之上

非翰林官謚文

謚典自建文君謚王文節公禕前後垂五十年文臣無

賜謚者有之自永樂中姚恭靖廣孝胡文穆廣始胡以
內閣得謚文遂為翰林所擅他曹莫敢與矣其亦有非
翰林而謚文者御史中丞誠意伯劉文成公基行部左
侍郎馮文簡公京吏部尚書姚文敏公夔唐文襄公龍
左侍郎葉文莊公盛南京吏部尚書魏文靖公驥左侍
郎儲文懿公瓘南京戶部尚書王文莊公鴻儒禮部尚
書鄭文安公賜左侍郎儀文簡公智南京禮部尚書楊
文恪公廉邵文莊公寶大理少卿李文通公奎刑部尚

書何文肅公喬新工部尚書周文襄公忱南京工部左侍郎何文簡公孟春右侍郎黃文毅公孔昭都察院左都御史蕭文昭公維禎左副都御史吳文恪公訥新建伯王文成公守仁王公以武勲得之尤為奇偉謚又與劉誠意同然劉嘗為弘文館學士內王文莊曾為國子祭酒周文襄曾預庶吉士所謂揆宿者也

翰林不謚文

翰林臣不謚文者謹身殿大學士王毅愍公文文淵閣

大學士陳莊靖公文文淵閣大學士袁榮襄公宗臬侍
講劉忠愍公球戶部尚書前中允侍講楊莊敏公鼎禮
部尚書前庶子侍講盛榮簡公端明南京吏部尚書前
學士朱恭靖公希周內劉重死事袁由長史遷盛以藥
餌召陳王以避名朱以避父諱楊公不知所以

謚不避名

謚不避名者金尚書忠謚忠襄徐蔡公忠謚忠烈於先
王尊名之典不盡合也林侍郎文俊謚文修程侍郎文

德謚文簡張太師居正父文明今謚文忠皆以不偏諱故

四品以下官得謚

謚法非三品以上兩京大臣不得與然而亦有得之者如楊恭惠信民以僉都御史劉文恭鉉以少詹事宋文恪訥李忠文時勉陳文定敬宗鄒文莊守益以國子祭酒李文通奎劉文介儼以太常少卿俱四品朱文肅善胡文穆廣吕文懿原以翰林學士張文僖益以侍讀學

士楊忠愍繼盛以兵部員外郎朱忠定復張恭僖景明
以長史俱五品徐文肅善述以春坊中允王文靖汝玉以
贊善王忠文禕以翰林待制劉忠愍球以侍講羅文毅
倫舒文節芬俱以修撰羅文恭洪先以贊善蔣恭靖用
文以太醫院判俱六品鍾恭愍同以御史七品陳恭愍
選以布政毛忠襄吉周節愍憲馮恪愍傑許忠節達以
憲副岳文肅正以知府鄧恭毅顥以知縣皆藩臬郡守
外臣諸公或禁近碩德或封疆殉義無愧賜名者獨蔣

以技藝小臣獲之殊為幸耳楊豫孫所著謚纂有日南
知州何忠謚忠節上蔡知縣霍恩謚愍節當是祠額非
謚也又有太醫院使袁宏謚襄敏攷正史有祭塋而無
謚

改謚

建文初謚湘戾王栢後改謚獻臨潼惠簡王公銘追封
秦王改謚安和僖王誠源追封秦王改謚莊新化端和
王知燁追封晉王改謚康肅安和世子真湊進封肅王

改謚靖靈川榮懿王銓銖追封瀋王改謚安福山恭和王勛泚追封瀋王改謚靖

建文贈翰林待制王禕學士謚文節後改忠文國子祭酒李時勉初謚文毅亦改忠文榮國公張玉初謚忠顯改忠武會昌侯孫忠初謚康靖改恭憲保國公朱永初謚武襄以同父號旋改武毅內閣學士曹鼐初謚文襄改文忠石琚初謚文隱改文介張治初謚文隱改文毅

四字謚

真人禮部尚書邵元節卒特賜謚曰文康榮靖真人陶仲文卒又特謚榮康惠肅古稱貞惠文子有三字者今乃有四字亦無前曠典按邵初死內閣擬二謚御批俱用耳見顧文康夏桂洲諸公碑誌可據後至仲文亦用邵例至隆慶初俱追奪

追謚三代

開平王常遇春卒上追贈其曾祖四三銀青榮祿大夫上柱國中書平章政事謚莊簡祖重五開府儀同三司

上柱國少保中書平章政事謚安穆父六六開府儀同
三司上柱國太保中書右丞相謚靖懿自唐宋以來未
有謚及三代者蓋上是時念王功高因循元制故有此
舉耳然謚以尊名名尚未有何所取尊

夫妻贈謚異典

永樂十四年保聖賢順夫人馮氏夫王忠贈左都督謚
恭靖洪熙元年衛聖夫人楊氏夫蔣廷珪追封保昌伯
謚莊靖此皆因妻而得封爵贈謚也洪武中黔國吳威

毅公復妾楊氏封淑人謚貞烈正統中晉憲王妾孫氏石氏封夫人謚貞節以死義故此皆因夫而得贈謚者也其王妃之以節特謚者凡十三人不悉載

公主賜謚

公主故無賜謚惟仁廟以第四女早夭而最鍾愛特謚德安公主世宗朝太師翊國公郭勛承恩請追謚高祖母永嘉大長公主特賜謚曰貞懿

夷狄賜謚

夷王得謚者日本王源道義謚恭獻高麗王王顥謚恭
愍李旦謚康獻李芳遠謚恭定李珣謚恭順李娉謚康靖
淳泥國王麻邪惹加那乃謚恭順蘇祿國東王巴都葛
哈叭答刺謚恭定格默勒朗國王衛喇義伊德伯謚康靖

與推陞加秩

弘治十三年少保太子太傅兵部尚書馬文升首推吏
部不點特加少傅正德六年太子少保吏部尚書楊一
清首推內閣不點加少保太子太保仍蔭子錦衣衛世

襲千戶

轉官加官秩

秦司空金轉南兵部加太子太保倪宗伯岳梁太宰儲
吳宗伯一鵬轉南吏部胡司寇世寧轉左都李太宰承
勛改司寇陶司空琰江司徒東轉南兵部俱加太子少
保或以北之南似左或以部分稍亞故為加秩慰藉之
耳李司寇承勛改兵書左都理團營特加太子太保胡
司寇世寧轉兵書亦加太子太保趙文華自工部侍郎

進尚書特加太子太保郭吏侍朴衷吏侍煒由吏部侍郎進禮部尚書加太子少保盖殊寵也素以禮書入閣又特加太子太保易戶部遽得秘殿不一而足尤為卓異近馬公自強由太子少保禮部尚書入閣亦加太子太保兼文淵閣大學士

駙馬錄文蔭

駙馬都尉裔孫入監讀書者李琦孫禎成化二十三年送監尹清孫衡弘治十年送監沐昕曾孫琚弘治十一

年送監右皆乞恩得者嗣後兩宮徽號詔赦內有錄用一條不可勝紀矣

乳母錄文蔭

翊聖夫人劉氏男李通天順八年送翰林院習字授中書舍人累陞太僕寺少卿恭聖夫人男胡恭成化二年送中書習字授中書舍人累陞尚寶司卿

弇山堂別集卷九

欽定四庫全書

史部

弇山堂別集卷十一

詳校官編修_臣李潢

編修_臣裴勲覆助

總校官中書_臣朱鈐

校對官中書_臣李棨

謄錄監生_臣沈安邦

欽定四庫全書

弇山堂別集卷十

明 王世貞 撰

異典述五

文臣異途

國朝文臣入仕正途惟有進士鄉科歲貢選貢而已其
任子及國初賢良方正人材舉薦亦次之其有不由是
途而登顯位者畧紀於是

太子少師贈少師榮國公姚廣孝左布政使吳印華克勤俱以僧其翰林應奉李願證輩亦然

禮部尚書蔣守約李希安崔志端工部尚書陳道瀛徐可成禮部左侍郎丁永中金贊仁師宗記以太常神樂觀道士然皆不繇太常寺

太子太保禮部尚書贈少保許紳禮部左侍郎蔣宗武通政使司通政使掌太醫院事施欽仲蘭李宗周張鑾徐偉俱以醫

兵部尚書贈少師金忠以卜

太常寺丞贈少卿袁珙子尚寶司少卿忠徹以相

太常寺卿丘玄清以全真道人玄清嘗為監察御史以
二宮人賜之遂自宮

禮部左侍郎湯序右侍郎康永韶以天文生

禮部尚書邵元節少師少傅少保尚書陶仲文禮部左
侍郎掌通政司事李孜省太常寺卿邵常恩趙玉芝凌
中以方術

太子少保工部尚書萬祺以推命

太常卿顧玘以巫師

兵部尚書單安仁左布政使張真等以武弁

詳見異
典述

工部尚書徐果蔭一子至錦衣衛指揮一子營繕所正
及官生賜玉帶食正一品俸上有密旨及徐少師階欲
以崔志端例加太子太保徐公雖力止之然不知志端
原無加太保也又工部左侍郎蒯義右侍郎蒯綱蔡信
郭文英俱以木工

工部左侍郎陸祥以石工

工部左侍郎吳復以知印正統末由倉官主簿累遷也
陶仲文亦以知印授倉官後不復由資歷矣

吏部尚書張度戶部徐輝刑部李友直兵部滕德懋徐

晞工部李質萬祺

即推命人

吏部左右侍郎李信王春戶部

左侍郎掌光祿寺李亨禮部右侍郎掌光祿寺蔚能刑

部右侍郎劉敏王詔大理寺卿汪懋楊時習陝西左叅

政平思忠俱以吏又蘇州府知府況鍾泉州熊尚初西

安賈信亦吏也俱有政聲加正三品俸都御史中丞涂節吏部尚書郎本中侍郎汪河以省掾南京通政使張

苗以承差

係太監張敏從子

工部尚書嚴震直禮部尚書鄭沂以稅戶人材

通政使欒憚以輸粟貢

禮部左侍郎李嘉以奉祠所禮生

禮部左侍郎張俊以諳書寫人

太常寺卿杜安道洪尚觀以櫛工

光祿寺卿徐興祖井泉以厨役

布政使蔡春王興宗以阜隸

太子太保左都御史楊善太子賓客戶部尚書劉中敷
太僕寺卿崔文奎以守城諸生

大理寺卿朱奎太常寺卿任道遜林章工部左侍郎謝
宇俱以幼童薦直內閣林後官至從一品

工部尚書趙榮太子少保兵部左侍郎俞綱禮部尚書
張天駿工部尚書周惠疇禮部左侍郎張電工部右侍

郎談相王槐翰林院學士沈度大理寺少卿沈粲都察院右僉都御史凌晏如皆以習字選榮綱晏如皆真拜而綱嘗奉旨入內閣度實為學士晏如掌風憲又嘗為吏科都給事中尤奇

刑部尚書安圖工部侍郎額森特穆爾和克齊治書侍御史索諾木結右副都御史約爾珠四川左叅政閻泰瑪反以番將

按察副使裴叔耆潘季佑太僕寺卿趙煜以安南國歸

順人季佑偽太保也後以叅政掌又安府事

工部尚書黎澄子侍郎叔林以俘夷澄即偽虞大皇黎
蒼弟在本國官為推誠守正翊贊弘化功臣雲屯鎮魚
歸化等鎮諸軍節度大使姚江管内觀察處置等使雲
屯歸化嘉興等鎮諸軍事領東路天長等路大都督特
進開府儀同三司入内檢校左相國平章軍國事上柱
國賜紫金魚袋衛國大王澄幸免於僂而以善造神鎗
父子至八座祿食者近五十年年八十餘子亦近八十

可謂奇遇矣

任子大位

國朝重科目一途任子多不得大位獨燕府左長史朱忠定公復蔭子榮愿公濬至北京行部尚書禮部左侍郎儀父簡公智蔭子忠襄銘至太子太保兵部尚書學士呂文懿公原蔭子憲至南京太常寺卿少詹事劉文恭公鉉蔭子榮至太常寺卿掌尚寶司浙江按察副使陶公成蔭子魯至湖廣右布政使工部右侍郎黃文毅

公孔昭蔭子綰至禮部尚書江西按察副使許忠節公
達蔭子瑒至錦衣衛指揮使管衛事都察院右副都御
史孫忠烈公燧蔭子堪至都督僉事又蔭孫鈺至都督
同知皆品秩過其所自

工部尚書黎公澄蔭子叔林至工部右侍郎工部左侍
郎陳公壽蔭子常戶部右侍郎督倉場凡十七年少保
兵部尚書于肅愍公謙蔭子冕至順天府尹少師大學
士劉公吉蔭子銳少師大學士徐文貞公階蔭子璠俱

至太常寺卿三品少師大學士嚴嵩蔭子世蕃至工部
左侍郎加正二品服俸太子太保兵部尚書劉莊襄公
天和蔭孫守有至左都督太子太傅兵部尚書余肅敏
公子俊蔭曾孫蔭至都督同知少師吏部尚書楊襄毅
公博蔭子俊卿至都督同知俱掌錦衣衛事

任子清華之秩

北京行部尚書朱公濬子紹祖蔭通政司左叅議國子
監祭酒宋公訥子復祖蔭國子司業吏部左侍郎兼翰

林院學士曹公鼐子恩蔭翰林院編修文淵閣大學士
胡公廣子種尚書金公忠子達蔭俱翰林院檢討達改
給事中至兵科都給事中禮部尚書呂公震子熊侍郎
儀公智子銘銘子泰兵部尚書劉公儁子奎陳公洽子
樞吏部侍郎俞公山子誥蔭俱給事中以非常典紀之
如右

王國超封

秦鎮國中尉懷塔襲王是為宣王

周鎮國將軍睦樞襲王是為恭王

肅輔國將軍縉燝襲王是為今王按周王超二等肅王超三等秦王超五等尤為奇絕

超封公侯

二品超封公者洪武二十二年都督僉事胡顯封梁國公三十五年都督僉事丘福封淇國公朱能封成國公超封侯者洪武三年二十八侯內中書省左丞周德興江夏侯右丞薛顯永城侯趙庸南雄侯梅思祖汝南侯

都督僉事郭子興輩昌侯吳良江陰侯費聚平涼侯陳
德臨江侯都督副使顧時濟寧侯燕府左相華雲龍淮
安侯秦府左相耿炳文長興侯吳府左相吳楨靖海侯
俱正二品行省叅政傅友德潁川侯黃彬宜春侯陸聚
河南侯俱從二品平陽衛指揮使王志六安侯正三品
朔州衛指揮副使鄭遇春滎陽侯正四品自四年以後
安慶侯仇成永昌侯藍玉永平侯謝成鳳翔侯張龍安
陸侯吳復宣德侯金朝興懷遠侯曹興靖寧侯葉昇景

川侯曹震會寧侯張溫雄武侯周武定遠侯王弼普定
侯陳桓東川侯胡海武定侯郭英鶴慶侯張翼崇山侯
李新航海侯張赫舳艫侯朱壽全寧侯孫恪越雋侯俞
通淵永寧侯張銓皆以都督僉事二品封其以都督同
知封者僅沐西平英而已三十五年靖難功封都督僉
事張武成陽侯陳珪泰寧侯鄭亨武安侯孟善保定侯
火真同安侯王忠靖安侯徐忠永康侯張信隆平侯李
遠安平侯郭亮成安侯李彬豐城侯房寬思恩侯徐理

武康伯陳旭雲陽伯劉才廣恩伯陳瑄平江伯都指揮
使王聰武成伯徐祥興安伯趙彞忻城伯陳賢榮昌伯
都指揮同知李濬襄城伯張輔信安伯王友清遠伯張
興安鄉伯陳志遂安伯都指揮僉事孫巖應城伯房勝
富昌伯六年安南功封都督僉事柳升安遠伯蓋是時
伯階勲始定在侯之下一品之上故也自後無超封者
矣

峻加

勛武大臣三公凡太師八人太傅八人太保十九人其
不以漸而超加者韓國李公善長以太子少師加太師
魏國徐公達以太子少傅加太傅英國張公輔加太師
黔國沐公晟加太傅寧陽陳侯懋會昌孫侯繼宗慶雲
周侯壽長寧伯或瑞安王侯源壽寧張侯鶴齡建昌伯
延齡惠安張伯偉會昌孫侯銘加太保洪熙禮部左侍
郎楊士奇加少保遂進少傅通政使黃淮加少保太常
卿楊榮加太子少傅戶部右侍郎金幼孜加太子少保

景泰侍郎江淵王一寧蕭鎡加太子少師俞山加太子少傅俞綱及副都御史羅通大理卿蕭維禎通政使李錫加太子少保正德戶部尚書武英殿大學士王鏊吏部尚書武英殿大學士劉忠俱加少傅太子太傅

超遷

洪武初左右丞相正一品平章政事左右御史大夫從一品左右御史中丞正二品參政從二品尚書正三品其超遷者廣東行省叅政汪廣洋為御史臺左御史大

夫通政司叅議李素為中書右丞重慶府知府殷哲為
左丞起居注吳琳邵武府知府周時中常州府知府張
度中書省郎中王敏兵部郎中陳銘俱為吏部尚書河
南府知府王博前按察僉事李泰大都督府經歷俞溥
中書省郎中海淵戶部郎中程昱呂熙傑斯刑部郎中
顏希哲俱為戶部尚書起居注楊訓文翰林應奉陶凱
北平按察司僉事呂本禮部員外郎張籌主事牛諒俱
為禮部尚書紹興府知府唐鐸萊州府知府董俊行省

左司郎中滕德懋劉誠兵部郎中趙本給事中安統俱
為兵部尚書御史臺經歷劉希魯荊州分省贊理劉大
昕磨勘司令端木復初吳雲贊善大夫馮冕刑部員外
郎李宗藝主事陳璿俱為刑部尚書明州府知府余
文昇為工部尚書儀鸞司大使葉茂為福建布政使起
居注魏觀為太常寺卿

上元縣知縣孫克義為江西都事趙輝為湖廣給事中
李擴為四川秦府伴讀魏肅為北平晉府伴讀王鐸為

浙江司文監丞王璉為山西燕府伴讀李濬為吳府伴讀張里仁為江西俱行省叅政是時叅政從二品多以尚書遷其體稍重故附記之

洪武十三年以後陞六部尚書正二品侍郎正三品改行省為布政司左右布政使從二品其超遷者通政司叅議余燦為吏部太常寺少卿阮峻戶部郎中王肯左諭德趙瑁左贊善門克新監察御史任昂翰林院典籍劉仲質為禮部太原府同知溫飛卿考功監令李徵為

兵部審刑司左審刑王惠迪為刑部嘉興府知府薛祥
為工部俱尚書儒學訓導陳敬試吏部禮部郎中高信
御史李原明試禮部左叅軍劉遠刑部郎中胡楨前國
子監助教開濟俱試刑部右叅軍麥至德試工部俱尚
書戶部郎中范敏署本部尚書御史嚴震直為都察院
右都御史承直郎劉逢吉吏部主事崔善為吏科左給
事中侯庸張迪龍川知縣陳敬

即前陳敬也

中書舍人蹇義

為吏部右磨勘司令王道亨岳州府知府封益宗人府

經歷卓敬戶部員外郎聶震御史陳宗理為戶部左吏
科庶吉士楊靖北平部郎中郁新戶部員外郎莫禮李
彪主事夏原吉給事中陳潤教諭石璞為戶部右翰林
院檢討程性善為禮部左禮部員外郎李冕為本部右
兵部郎中齊泰工部主事沈潛御史彭祥為兵部左兵
部主事劉雋為本部右審刑司左詳議葛循刑部郎中
仕勵員外郎侯泰御史嚴震直即前人蕪湖縣知縣李行
素進士高鐸為刑部左刑部主事黃紹祖刑科給事中

張思恭刑部司務祁著暴昭為刑部右工部員外郎周
誼主事李文仲大理寺右評事王儁給事中冀凱御史
馮彬龍江衛經歷黃福羽林衛經歷邊彝進士秦遠鞍
轡局大使黃立恭為工部右俱侍郎承勅郎劉逢吉戶
部主事王克已試吏部右戶部郎中徐輝禮部郎
中杜思進試戶部左工部郎中李端前按察僉事
郭桓戶部主事傅友文右正言田友信給事中蔡
昇大同衛知事朱安仁試戶部右夷陵州學正張習

試禮部左司封員外郎朱同試禮部右署兵部員外郎
劉述兵部主事王暹襄陽衛知事賈勵試兵部右總部
郎中閻育都督府經歷商英給事中徐文顯庶吉士楊
靖試刑部右刑部主事宋性署刑部右虞部郎中韓鐸
試工部左都給事中冀凱署工部左給事中卓敬司務
王昇署工部右俱侍郎職方司郎中趙彛為通政使司
通政使祥符縣縣丞鄒俊為大理寺卿刑部員外郎吳
斌為都察院右副都御史按察僉事解敏御史唐鐸凌

漢為右副都御史三十日漢超右都御史戶部主事郭
資御史嚴德珉桂滿懷慶府通判戴莊都司副斷事高
翼為左僉都御史御史范俊常權邵質靜寧州判官元
善鄆縣教諭張紳南豐縣典史馮堅為右僉都御史詹徽
試左僉都御史御史袁著羅山縣縣丞袁泰試右僉都
御史御史景清劉觀司中署左僉都御史刑部主事鄧
大鏗署右僉都御史職方司員外郎向寶刑部員外郎
寇徽為應天府府尹右至靈王得一為太常寺卿兵科

給事中張泌為光祿寺卿景州學正胡季安試國子監祭酒國子助教趙新為山西左布政使

右王雋以奏事不實當問罪上謂其年少有才特赦而擢之趙彞向寶俱以九年考滿功過俱有奏請亦特超擢之有可紀也其鎮撫千百戶超授布政使等官已見武弁改文職中不復贅

建文兵部郎中盧淵為本部左侍郎兵部郎中古朴蘇州府通判徐垕為右侍郎山東按察司僉事胡子昭為

刑部左侍郎翰林院修撰練子寧為都察院左副都御史秦府長史茅大方為右副都御史

永樂左善世姚廣孝為太子少師左通政朱濬保定府知府雒僉為北京行部尚書交州府知府阮均布政司左叅議李友直北平叅議許思溫北平按察僉事馬京安岳縣知縣康汝楫為行部左侍郎臨江府知府劉翼南河間府知府崔衍建昌府知府同彥翊兗州府同知黎思凱戶部郎中李昶為右侍郎文選郎中陳洽為吏

部右湖廣左叅政郝鵬為戶部左浙江右叅政張春江
西右叅政蔚綬通政司叅議李文郁刑部郎中王鍾邵
武府通判王禮為戶部右浙江左叅議易英禮科都給
事中胡濙為禮部左陝西右叅政戚存心河南左叅政
郭敦右叅政王彰刑部員外郎宋禮為禮部右兵部郎
中方賓審理正喬穩為兵部左北平按察副使墨麟為
兵部右浙江右叅政趙莊左叅議左獻前北平右叅議盧
祥紹興府知府李慶刑部郎中楊勉為刑部右江西右

叅政張本福建右叅政房安為工部左山東左叅政郭
進山西左叅政鄭剛開封府知府任毅處州府知府劉
兼工部主事蘭芳行在吏科給事中楊和刑科都給事
中張信御史甄庸為工部右侍郎御史俞士吉張純
為都察院右僉都御史戶部郎中李暹營繕司主事賀
銀為通政使工科給事中戴希文為太常卿祿州判官
湯宗為大理右寺丞長沙府同知甄儀為順天府府尹
威清衛經歷劉禮興州前屯衛經歷王煥為湖廣左右

布政使洱海衛經歷沈仕溫為浙江行人蔣廷瓚為貴州俱右布政使天津左衛經歷王平為福建左叅政行人聞良輔為廣東按察使

洪熙鳳陽府照磨李準為太子賓客詹事府府丞黃宗載為吏部大理寺右寺丞鄒希賢為禮部大理寺寺丞孫時為兵部雲南按察僉事吳廷用御史金庠為刑部工部郎中蘇瓚易州同知裴璉為工部俱右侍郎湖廣左叅政李素為都察院右副都御史鹽運司判官向瑤

為右僉都御史即日進右都御史鴻臚寺右寺丞楊善
為本寺卿

宣德吏部郎中鄭誠趙新為本部左右兵部郎中趙倫
叅政劉璉吏科給事中王佐為戶部右叅政段民為南
戶部右禮科左給事中李琦為禮部左叅政王士嘉吳
紳禮部員外郎吳政為禮部右長沙知府李郁兵部郎
中柴車御史于謙為兵部右叅政葉春刑部郎中丁鉉
員外郎曹弘為刑部右按察副使成均為南刑部右越

府長史周忱工部郎中黎澄御史羅汝敬為工部右刑
部郎中段民署戶部右即前按察副使魏源署刑部右
俱侍郎御史李濬吳訥為都察院右僉都御史按察司
知事李嘉為通政使

正統吏部郎中曹義為本部戶部郎中王淪沈翼吏科
都給事中張睿孟鑒為戶部禮部郎中楊寧為本部兵
部郎中侯璉為本部温州府知府何文淵刑部郎中李
棠御史馬昂為刑部武昌府知府卬旻武選司主事王

佑工科給事中張敏王永和御史王永壽為工部御史
齊韶為南京刑部武庫司郎中徐晞試兵部俱右侍郎
按察副使陳鑑朱與言建昌府知府陳鼎為右副都御
史福建僉事魯穆浙江僉事張楷御史王翺羅亨信段
俊俊一作信為右僉都御史

景泰翰林院侍講洪璵為吏部吏部文選司郎中李賢
翰林院侍講楊鼎侍讀儲懋兵科給事中劉清為戶部
翰林院侍講王一寧編修陸琦禮科都給事中章瑾李

實吏科給事中姚夔為禮部翰林院侍講杜寧為南京
禮部兵部郎中項文曜王睟鄒幹為本部翰林院侍講
江淵為刑部工科給事中張敏為工部俱右侍郎兵部
郎中羅通兵科給事中孫祥為都察院右副都御史刑
部郎中陸矩輦昌府知府韓昱兵科給事中王竑御史
任寧段信為右僉都御史中書舍人王榮為大理寺右
少卿

天順吏部驗封司郎中張用瀚為本部戶部浙江司員

外郎劉本道為本部禮部祠祭司郎中蕭璵欽天監中
官正湯序為禮部吏部驗封司郎中赫璜戶部江西司郎
中陳汝言為兵部太僕寺少卿黃仕儒為刑部大同府
掌府事叅政霍瑄為工部俱右侍郎又太僕寺丞孫弘
為工部左侍郎

以上皆石亨
曹吉祥薦也

戶部郎中薛遠禮部郎中

章綸刑部郎中周瑄各本部右侍郎御史滕昭國子監
學正林聰俱為都察院右僉都御史

成化御史章璫屠瀟按察司僉事汪浩翰林院修撰張

願俱為右僉都御史璫撫陝西瀟協理院事浩督四川
軍務願撫宣府自是而後部院位日益重而郎署以下
日益輕矣

弘治南寧府知府楊守隨為應天府府尹鶴慶府知府
張海為順天府府尹

正德光祿寺卿張駿周惠疇為禮部尚書又尚寶司丞
周惠疇為光祿寺大理寺評事楊立為太僕寺卿河南
按察僉事王鼎為順天府府尹

嘉靖中巡按御史胡守中以扈駕勞陞都察院右僉都御史兼詹事府丞先人以御史按順天與浙江巡按御史胡宗憲俱陞都察院右僉都御史工部右侍郎趙文華以論李太宰陞太子太保工部尚書主事桂萼張璁霍韜員外郎方獻夫以議禮萼璁為學士韜獻夫為侍講學士御史王大任姜儆以訪僊陞翰林院侍讀學士

光學超遷

翰林以光學士為重若講讀以下得超遷者誠為異典今

按以侍讀遷者曹文忠鼎商文毅輅萬文康安倪文毅
岳及今嚴太保訥以修撰遷者李太師春芳以尚寶丞
遷者黃諫以右中允遷者董宗伯份又彭文憲時以侍
讀楊文忠廷和以左中允俱遷左春坊大學士又國初助
教宋訥拜翰林院學士翰林院編修羅復仁拜弘文館
學士典籍李翀拜侍講學士

洪武以翰林院待詔朱善為文淵閣大學士典籍吳沈為
東閣大學士洪熙以光祿署丞權謹為文華殿大學士

權之此遷蓋尤異也

布政遷尚書

高帝之時藩司與六部均重以故少遷入者建文時雲南左布政使張紱入為吏部尚書右布政使陳迪入為禮部尚書山東左布政使鐵鉉進兵部尚書其時尚書秩正一品永樂時北平布政使郭資為刑部尚書正統時陝西按察使陳智為掌院右都御史布政使劉中敷為戶部尚書石璞為工部尚書蕭昶石瑁為禮部尚書

張惠為南京禮部尚書陸瑜為刑部尚書陸之後絕響矣
永樂宣德間左右侍郎副都御史轉布政使如魏源弋
謙之類而布政使遷侍郎都御史必食從二品祿

文臣從龍遷秩

洪熙宮臣輔監國者吏部尚書蹇義加少保左春坊大學
士楊士奇為禮部左侍郎兼華蓋殿大學士前右春坊大
學士黃淮為通政使兼武英殿大學士司經局洗馬楊溥
正字金問為翰林院學士

宣德宮臣左庶子陳山為戶部右侍郎尋進尚書謹身
殿大學士右庶子張瑛為禮部左侍郎尋進尚書華蓋
殿大學士右贊善王讓為吏部右侍郎洗馬戴綸為行
在兵部右侍郎其他若詹事府府丞艾良鄭焯左春坊
左中允張宗璉僅為大理寺左右寺丞右春坊右中允
徐永達為鴻臚寺左少卿林長懋至出為鬱林州知州
右司直郎蔣先為尚寶司丞張景良為四川順慶府通
判清紀郎韓岫為刑科給事中左司諫林宗儒王永錫

為鴻臚寺司賓司儀署丞右司諫吳顥為國子監助教
司經局校書馮景浩為禮科給事中正字陶永成為國
子監學正其不出外局者獨左贊善蘭從善左司直蔣
驥高穀得翰林侍講而已豈其時宮臣之設未幾又多
不由科第進者耶而鬱林順慶之除又何也綸尋出鎮
交趾以舊嫌逮下獄死並諸父河南知府賢太僕寺卿
希文百口俱籍沒希文幼子下蠶室至太監

景帝自邸邸即位邸府左長史儀銘為禮部左侍郎審

理正俞綱為太僕寺少卿伴讀章文為太常寺丞楊輿
為戶部郎中俞山為鴻臚寺左寺丞良醫陸子才忻克
敬為太醫院判審理副等官李亨等二十三員為州同
知致仕右長史楊翥為致仕禮部左侍郎銘至兵部尚
書加太子太保山綱至吏兵二部侍郎俱加太子少傅
少保文亦進尚書輿進侍郎

世宗由興邸入紹故左長史張景明贈太子少保文淵
閣大學士右長史袁宗臯超為吏部左侍郎兼學士遂

為禮部掌文淵閣大學士紀善周詔為少詹事兼侍讀
至太常卿審理正高嵩太僕少卿伴讀吳大田太常寺
丞典寶黎民右副都事典儀正王錦典儀副周璧鴻臚
左右丞良醫副楊立太醫院判趙銘等復陞寺丞等官
大田後至工部左侍郎高嵩趙銘俱太常寺卿

穆宗由裕邸入紹前授書侍讀高公拱加少保太子太
保吏部左陳公以勤為禮部尚書文淵閣大學士右侍
郎張公居正為左侍郎兼東閣大學士侍講學士殷公

士儋為禮部右侍郎待詔等官王凝劉奮庸俱加尚寶
卿少等官有差閒住右諭德唐汝楫陞太常寺少卿致
仕

布衣超擢

太祖自立國時省臺要地俱以勲舊充之其所聘用如
劉誠意宋文憲輩雖禮寄優崇而頗循資序自胡陳之
後羣臣鮮當意者法網嚴密誅斥相繼而學士大夫亦
多所引避於是不愛高爵越資以收天下之賢俊而有

朝徒步暮金紫者永樂中亦間行之其可紀者儒士王
本杜佑龔穀杜穀趙民望吳源為四輔官兼太子賓客
位尚書上賢良郭允道秀才范敏曾泰為戶部尚書稅
戶人才義門鄭沂為禮部尚書儒士趙翥為工部尚書
武英堂紀事監生黃義為湖廣行省叅政儒士張子源
試禮部右侍郎張宗德試兵部右侍郎耆儒劉堦闕賢
為諫院左右司諫兼左右春坊左右庶子趙肅何顯周
為左右正言兼左右諭德儒士藍子貞張伯益為都察

院左右副都御史陳玄為右僉都御史明經張文通阮仲志試左右僉都御史人才赫從道試大理寺右少卿孝廉李德為南京應天府府尹儒士吳顯為國子祭酒稅戶義門鄭濟王懃為春坊左右庶子賢良孟性賢為廣西左叅政文學宋亮為福建左叅政儒士邢浩為河南盧友常為山東齊瞻為四川俱左右布政使金良佐為廣東吳昭為山西陳宗顏為陝西俱左右布政使又鄒伯源等十一人為各布政司叅政叅議又儒士張璠為陝

西左布政使安處善為湖廣徐子民為山東曹岱為浙江梁伯與為河南彭友信為北平韓宜可為山西李宜之為江西俱右布政使又國子監生劉政鄧志和為福建左右顏鉞申達為北平左右周振張璉為河南左右王允陳嘉為山西左右薛郁董倫為陝西左右俱布政使楊允為浙江楊鏞為山東方溫為湖廣俱右布政使龍鐔為浙江阮友章為福建王禮為北平李皓為山西曲能為山東俱按察使蕭禮敬等二十五人為左右叅

政叅議朱源等二十一人為副使僉事其一時銓補乃爾豈空印事發藩臬諸臣俱得罪耶又以留守中衛指揮僉事陳燭子信試四川左叅議鳳陽留守中衛指揮僉事韓春子恕試右叅政則官舍也驍騎右衛千戶俞清弟立試廣東左叅政府軍左衛千戶陳亨弟貞試右叅政則軍餘也抑又異矣

又人才董從先魯昉楊仲禮署浙江王守政蔡均美謝直方王秉彛署福建俱布政司而不言何官

永樂中人才馬麟為湖廣盛儀為浙江俞景周為山東周克敬為廣西俱左布政使孫豫為山西江潤為河南艾瑛為浙江俱右布政使吳衡等六人為叅政叅議自是而後始絕響矣布衣躋方面可謂奇遇然二朝諸公宋亮以下俱無登八座者

洪武中耆儒鮑恂余銓張長年同日拜文華殿大學士以老固辭賜宴遣歸永樂中以儒士武周文為翰林侍講學士以老致仕天順中以布衣吳與弼為左春坊左

諭德不就

弇山堂別集卷十